

張繼 主編

中華道藏

華夏出版社

十五『國家重點圖書出版規劃項目』

主編 張繼禹

本冊主編 李大華

中華道藏

第二七冊

華夏出版社

目錄

001 雲山集	一
002 離峰老人集	六〇
003 真仙直指語錄	七八
004 諸真內丹集要	九二
005 上乘修真三要	一〇七
006 道禪集	一一九
007 悟真集	一二三
008 洞淵集(長筌子)	一三五
009 上清太玄集	一七二
010 上清太玄鑑誠論	二四七
011 上清太玄九陽圖	二五一
012 析疑指迷論	二五六
013 雲宮法語	二六三
014 中和集	二七二
015 清庵瑩蟾子語錄	三一八
016 全真集玄秘要	三五一
017 三天易髓	三五八
018 會真集	三六三

019 啓真集	三八九
020 自然集	四〇五
021 西雲集	四〇九
022 紙舟先生全真直指	四一九
023 抱一子三峰老人丹訣	四二二
024 抱一函三秘訣	四二九
025 玄虛子鳴真集	四三九
026 玄教大公案	四四三
027 玄宗直指萬法同歸	四六七
028 上陽子金丹大要	五二〇
029 上陽子金丹大要圖	五九五
030 上陽子金丹大要列仙誌	六〇〇
031 上陽子金丹大要仙派	六〇四
032 修煉須知	六〇八
033 陳虛白規中指南	六一五
034 鳴鶴余音	六二三
035 全真清規	六八七
036 全真坐鉢捷法	六九三
037 還真集	六九五
038 道玄篇	七二一
039 青天歌注釋	七二七
040 崔公入藥鏡注解	七三〇

041 隨機應化錄	七三七
042 群仙要語纂集	七五一
043 原陽子法語	七六六

001 雲山集

經名：雲山集。元姬志真撰。
八卷。底本出處：《正統道藏》
太平部。參校：雙照樓影印元
刊本。

目錄

卷一

賦

七言古調長篇

五言古調長篇

七言律詩

卷二

卷三

五言律詩

長短句

七言絕句

卷四

六言絕句

五言絕句

跋

卷五

詞

卷六

卷七

碑記

卷八

雲山集序

庚戌夏五月，友人論伯瑜至自相臺。話舊之餘，忽出知常先生文集一編，將以板行垂世，且索序引義，不得以荒鄙辭。披玩數四而弗能已，至於賦評論記，銘叙歌詩，或感物而造端，或因人以示意，大率以演暢真風，蠲滌塵累為主。意其宏才博識，非夙學穎悟，孰能與於此哉？先生世本澤郡名族，幼讀書，習儒業。業成，涉大變，因歸玄教，盡棄世緣，徑遂神遊八表之志，何其偉歟！借使當年值承平，據素業，展盡底蘊而兼善天下，其積功種德爲如何哉！唯其時與事乖，於是退而作獨善之計，以修身養性，日飲聖腴，與古仙上靈爲之侶。時有著述，以鳴道妙，而啓迪後人。此兩者，蓋知常與時舒卷之勢然也，初何容心哉？七月一日綠野雲孫長安裴憲子法引。

道行乎教，非文不宣，蓋將以招衆而傳遠也。自黃帝、老子垂世立教，已

有《陰符》《道德》二經出焉。其後《文》《元》《列》《莊》，立言滋多。逮及唐宋，著撰彌廣，皆所以發天人秘密，示學者之津梁。宋末金初，有所謂全真家者，以心傳心，不立文字，然重陽祖師以降，急於化人，皆有教言以惠後學。近世栖雲大老《化導緣深語錄》一編，高出前輩。一傳而得吾知常子，心地坦明，問學該贍。六十四卦，八十一章，咸有解釋；而又作《南華解義》《沖虛斷章》，言簡而意足，義深而理明，其可謂黃冠之錚錚鉸鉸者爾。間于應物之際，遊戲翰墨，其賦詩歌論，碑記雜文，娓娓可觀，號《雲山集》。長安裴憲子法已叙之於前，其友李君提舉復求余說綴於後。余與知常有平昔之好，僂爲作《易解後序》，今何辭焉。歲旃蒙赤奮若慎獨老人東明王鶚百一序。

雲山集卷之一

知常真人姬志真撰

賦

性賦

輝前照後，博古明今。出爲生而

入爲死，靜乃性而動乃心。窮浩劫之靈源，幽深恍惚；體無生之妙用，隱顯浮沉。當其未鑿混沌之前，不動檀那之際，示地文而冥會爲定，發天光而朝徹爲慧。蓋已超於幻境，恍爾難名；即自契於真常，翛然無係。故用有動靜語默，即體非味色聲香，縱之則蕩於遠邇，收之則入於毫芒。猶寒灰之重焰，若枯株之再芳。煉真實以成丹，鬼神莫測，搏虛空而作塊，兵刃奚傷。至如作止萬殊，根源一共。有以俏措拈弄者，當機薦取。有以澹薄安養者，飲醇受用。白牛之泯滅無迹，寶塔之玲瓏沒縫，壁間掛口，不殊筋陡浪傳神；棒裏翻身，何異擲交拈作頌。若乃物

來斯照，感而遂通，印星斗於澄潭之底，現胡漢於明鏡之中。運樞環於妙用，即流波之太沖。繫片段之舒閑，山雲莫比；瑩圓明而皎潔，江月難同。彼且不飲神漢而妄恣七情，不保天游而相攘六鑿。輕錢踴劍之所似，飄瓦虛舟之未若。祇形器之所域，背玄風之可託。大施之門無擁塞，普化驢鳴；不言之教甚昭彰，鴻蒙雀躍。偉哉，虎溪携手而同笑，南郭仰天而獨噓。叙學有九年成大妙，印可有一宿證無餘。蓋巨細洪纖，頭頭至道，飛潛動植，色色真如。詭說公孫，辯強名於非馬；多方惠施，詰至樂於游魚。咦，刮野老之雙睛，斷山童之一指。參乎應唯而已貫，回也坐忘而得使。迷則精衛銜土，以填滄海；悟則罔象求珠，而投赤水。動手則差其一著，開口則失之千里。雖因行而掉臂無妨，落筆盡塵垢而已矣。

心賦

性本於道，情生乃心，聚根塵之淵藪，領善惡之喉衿。念念遷流，往不停

而今不止；新新嗣續，動斯顯而寂斯沉。當其非有非無，爲想爲識，出則麗事而著物，動則隨聲而逐色。捨之不可去，取之不可得。立總羣魔之帥，浩劫常然；坐爲三業之魁，無時自克。若乃塵慮靜盡，神明晏居，光發寒灰之焰，祥生特室之虛。隱大無外，藏微有餘。脫盡簾纖，到不知而若近；承當穩密，隨所用以皆如。至於撥火然香，烹茶掃地。信手拈來者，物物相應；隨身放下者，頭頭皆是。江河淮海，勢雖異而水無殊；釵釧餅盤，用有差而金不二。若乃隨宜變態，逐境生緣。其靜也凝而地，其動也懸而天。應於足則移步盤膝，應於手則握掌成拳。作止抬拈，據獨化無形之主；見聞知覺，占當機用事之先。若夫超越乎十地三乘，籠絡乎五行四象。在中立而不倚，能內保而不蕩。暫矜向上之消息，即墮今時之伎癢。洙泗宗風何所，在入室升堂；漆園妙處若爲，將推門放杖。偉哉，一竅虛通，八面玲瓏。珠璣玄虛之上，丹圓寶鼎之中。混乾坤

爲一體，奪造化與同功。無象無私，若春陽之及物；不留不礙，如秋月之行空。嘻，順事而安者，就路還家；因物而用者，隨流得妙。大量江海兮，無所不納；高懸日月兮，何方不照。物我一域，有無同微。斯乃五常百行之樞機，萬聖羣真之總要。

七言古調長篇

悟空

茲生浩劫何癡迷，引延若藕蟠青泥。安知造物故相戲，壑舟夜半移東西。攻心利欲黃門劇，目眩空花認爲實。風刀劫火自天來，煽赫崑山焚玉石。俗緣一掃盡成空，及蒙大有開牢籠。始信黃糧未炊熟，忽驚鍾遞樓頭風。放眼纔知夢中惡，細想從前事渾錯。皇天賜我好因緣，跳出塵凡得真樂。人間到了空無依，爭如撥轉重玄機。功成卸却娘生襖，五雲宮闕乘風歸。

證怪惑

道人遊戲真三昧，變化神通如狡獪。

淵默雷聲震九天，尸居日照周沙界。金雞報曉泥牛走，枯木龍吟頑石吼。玉女吹簫作鳳鳴，木人應節翻筋陡。毫芒消息天關機，拍塞虛空無盡期。非有非無不可測，或逆或順那能知。大妙九年必期進，造塗七聖迷所之。推問放杖會未得，眨眉弄眼空相窺。

證夢惑

昔聞穆滿遊玄宮，清都絳闕雲屯空。更移向上或驚悸，天風吹落歸樊籠。又聞黃帝華胥國，飛步履虛如履實。雲霞徹視山谷平，仍似燔林壁中出。神遊夢及未離方，乘風遊月非其常。一超直入崑崙頂，本然固有誰承當。塵世悠悠夢顛覆，真妄顛預訟爭鹿。槐枝勳業鬧蚍蜉，蝸角功名戰蠻觸。覺今夢兮俱鴻蒙，我今寐寤猶同宗。借問主人開眼未，一聲風送樓頭鍾。

招隱

君不見，邯鄲枕中得如意，磨鏡未明人換世。又不見，槐安官裏尚金枝，螳戰功名黍一炊。遍界盡爲開眼夢，化工幻惑閑般弄。似寄懸絲傀儡棚，

寧許暫如山不動。智也無涯生有涯，悠悠千古未還家。家園素有知何在，誰趁東風賞覺花。歸去來兮宜早早，步步清涼除熱惱。頃刻光陰下手遲，莫待形容變枯槁。

偶成

人間萬事輕浮雲，消長起滅隨時新。或吹繁華變霜曉，或吹枯槁回陽春。孰能肝腸如鐵石，誰能眼孔如車輪。盡情冗冗逐虛幻，頃刻一窖同埃塵。何如進及真中真，掃除萬慮清吾神。丹成跨鶴獨歸去，天地雖老存茲身。

郭子淵之汴索詩

余生懶癖居林泉，茅茨窳窳孰可憐。一無所堪百不用，擁腫軼掌圖安然。上人垂教莫敢侮，祇恐節外生因緣。咄嗟贅形實大患，出門未許披寒暄。先生約我欲南去，自信方物那能圓。鳬鳥不飛風莫御，兩足怕舉愁臍肝。臨行惜別要詩句，空洞此腹無雲煙。溪藤落筆失真素，墨池點破非重玄。聖壘好在運斤手，不期緩急新輪扁。慙慙書此激崑電，笑擲瓦礫搖吟鞭。

與杜教授母慶八十

康寧富壽人間優，期頤耄耄希等侔。長松鬱鬱貞石固，玄鶴孤立靈龜游。有數有形寄澤壑，化工夜半移山丘。何如麻姑相與儔，坐斷黃龜幾出頭。珠玕列植遠瓊屋，山谷不躡雲霞遊。交梨火棗日厭飫，玉芝石髓尋常羞。芥城拂石不可計，幾回清淺蓬萊洲。

祝真常真人壽

簷楹佳氣鬱葱葱，東皇戒旦驅融風。莫飛四葉應真造，九光霞映蓬萊宮。霓旌月節捧麟馭，丕顯玄風大宗主。世間甲子纔一周，銅狄摩挲閱今古。金堂玉室本無塵，瑶林琪樹輕莊椿。壽光寂照通理窟，樞環圓應休天鈞。清都永錫春難老，拂石芥城何足道。命蒂栽培高厚先，無窮豈與人求壽。特拈心炷香非煙，冀伸愚懇猶瞻天。歌以長言薦雲几，朱顏歷劫常依然。

西岳老靜廬中或生筭長數尺索詩

歲寒蟄窟藏豐隆，鬱結盤桓懷道冲。乘時順動莫可待，自春徂夏黃埃中。欲伸不伸化成物，蟠根錯節遲天工。

荒叢雜沓不足賴，卓爾突出西岳宮。抽萌脫籜清且勁，分枝布葉張其雄。先生有道求入室，倚門化作青衣童。未容香嚴透消息，妙傳得自懸壺公。虛心內蘊縮地脉，頃刻萬里猶乘風。保護龍孫無少損，琅玕莫比纖塵蒙。異日功成藉斯力，信步六合遊無窮。

馮權教慶誕以壽山為祝

渾淪未判包乾坤，有無巨細悉固存。元始虛皇建中極，天柱卓爾名崑崙。其上無蓋總天目，其下無底擎地軸。宮殿盤鬱山之巔，璇璣運轉山之腹。挺拔巉巖羣玉峰，直超象外無爭雄。大貌姑射與太華，下視培塿輕喬嵩。神人肌膚瑩冰雪，心若淵泉與日月。劫塵滄海任更遷，不古不今無耄耄。但願老仙如此山，長春永不凋朱顏。蠹爾具瞻履綦下，悉開聾瞽通玄關。

跋非時桃花

物理榮枯自有時，差時逆俗心自疑。此桃開花固非正，韜藏結實無人知。霜凌卉木百草死，卓然獨顯天生姿。道人愛此異凡格，連枝折示誇奇特。

可憐此種非蟠根，移向長春洞中植。
開花結子三千年，珍味閭浮少人得。

寄路才卿

造物弄人如弄丸，無端幻惑巧相謾。
憶昔癸未二三月，搖蕩故園戈戟寒。
漏洩殘喘各逃散，千里區區行路難。
此命此身寄復寄，先生玉庇均平安。
何當六月政暑雨，驚報此晉摧神姦。
吳兒路滑豺虎斃，泫氏風情雲水閑。
邇來車軻朝暮發，必料故鄉衣錦還。
歸心繚繞西南道，行色依稀上下山。
野夫政坐迷惘疾，忍附驥尾那能攀。

五言古調長篇

勉世

人生約百歲，倏忽如彈指。俱爲造物戲，擾攘不得已。遑遑朝抵暮，切切憂與喜。千己盡成空，況復非千己。無窮分外事，逆順相汝尔。惡念等山丘，良心無一唯。閭家老子來，頃刻不可止。勸君且莫癡，歸計求依倚。跳出業火坑，不作舊行履。撥轉又玄關，

長生從此始。

寄道友論伯瑜

昔在紫峰下，雲霞相對披。危亭接軟語，朝夕心忘疲。西風豁塵襟，杖屨相追隨。悽悽別鎮陽，目送行遲遲。臨歧約鶴山，乘流不可知。勢如羊角戾，動有染絲悲。西南雲水窟，坐使心旌馳。逆順乃天理，行止非人爲。彼意直如繩，此心圓似規。千里共明月，罔間毫與釐。飛神相來往，恍惚無預期。同遊天地一，寧許斯須離。躡景並淩虛，飄飄奚復疑。從此三真會，時時承芝眉。

住院

住人不住院，寧論物成敗。住院不住人，何殊俗柵械。友雲及飛觀，熟視同草芥。彌費汗血力，數窮終至壞。何如真箇人，誦一言一話。朝夕飲瓊露，默默得神解。飄飄出六塵，徑徒超三界。亘初明月珠，肯向人間賣。我來略住院，不責寬與隘。但覓雲霞友，似欠多生債。安心處嘈雜，名利非罣罣。天賦性寒凜，坐致俗睚眦。越超

良獨難，傲睨吁可怪。患此重玄病，膏肓爭得差。未肯自束縛，何能呈狡獪。祥風吹神襟，杖屨輕且快。南北與東西，飄飄學行邁。

幽居

幽居愜野情，生事未嘗理。交朋幾離合，童穉相汝爾。連牆如有敵，經歲不相齒。世態冷於冰，人情淡如水。鶉衣密補袷，藿食忘甘旨。疏散百無縈，自得而已矣。

形幻

有身致大患，忘我復何憂。形骸最親切，畢竟成土丘。況茲身外物，無物非何樓。大塊勞以生，冗冗不自由。萬事素已定，誰能分外求。疑團自粉碎，休休復休休。莫爲空幻具，還作真箇囚。廓然自心安，宜與化同遊。於生無一爲，姑置不復留。穎脫出塵空，表裏絕綢繆。亘古性月在，輝輝天霽秋。

世偽

閉戶懶出門，衆議失和暢。策杖走街衢，冷眼憎流蕩。合境責紕繆，絕

交噴矯誑。緬相作人難，動止皆招謗。自究心未灰，莠然真作妄。灰心復忘形，誰驚魔與障。紛紛人世間，非是無定相。各自立偏見，同己聲相向。大地盡紅塵，從交翻白浪。重玄得品味，頓悟通真況。自性孤月圓，襟懷天一樣。跳出死生關，透入光明藏。

出觀

我初學守愚，渾淪無罃罍。久靜復思動，多口相誇詭。臭肉候來蠅，行貨非待價。數數致窮屈，鼓舞不得暇。未能無汝保，相執莫非詐。幽鳥仰投籠，白駒驅就駕。禹步及雲集，俱爲化所化。世俗喜驚駭，閭閻聽誑諛。清淨輔真實，豈願人咨訝。搏空鵲鶴飛，寧知老鷗嚇。萬塵付一笑，取次得休假。明明向上事，彼各不相藉。逕入無何有，受用如倒蔗。末後竟何如，天下藏天下。

法身

重玄妙法身，物我皆具備。微塵拆世界，大量包天地。巨細億萬殊，根源同一致。譬如溟渤中，鱗甲同沾利。

悲哉墮有情，復爲形所累。淹沉生死窟，輪轉皮毛類。降本迷浩劫，苦楚如倒置。賢聖垂方便，救援無遺棄。奈何聰不明，相對如夢寐。

壺天

壺天接人境，絕點純清涼。殿閣倚空碧，氣象連山蒼。薰風自南來，頓遣祝融藏。蒙莊及辨惠，揮塵談冰霜。更上臨漪樓，俯瞰潏流長。野鶴各自適，高柳搖晴光。主人有好懷，不酌鵝兒黃。特製勝玉屑，爲我搜枯腸。緣慮破纖悉，逕及無何鄉。至樂美四并，受用烏可量。誰問東華主，軟紅塵土香。

跋董節副黃糧夢手卷

晝爲開眼夢，夜作夢中夢。眼開脂合俱冥蒙，生滅廢興閑戲弄。爲蝶爲周不自知，眨眉舉目端爲誰。邯鄲邸中獲如意，蓋世功名黍一炊。塵世光陰遽如許，織烏忽忽經旦暮。情知萬事徹底空，大化忙忙幾人悟。迺公獨得重玄機，放眼分明覺夢非。未肯瞞頂訟爭鹿，五雲宮闕早時歸。

吊無欲真人

隴右老仙公，壽歷先天永。慈念落人間，臨目閱塵境。八十有六年，迅如彈指頃。思復白雲鄉，棄却丹砂井。幻出彩雲容，沉冥黃鵠影。逕入寥天一，少焉猶鏡靜。寶珠無遺響，衆瞻俱莫省。虛堂夜未央，月掛松梢冷。

世事

萬形寄寥廓，動止高厚并。化機隨用撥，物理逐時更。交臂今成古，轉頭枯與榮。無情翻變態，着力戲浮生。提掇鴻蒙子，施張傀儡棚。交唆童作劇，擷弄蟻興兵。虛幻一團物，悲歡百種情。死生車轉轂，劫運芥填城。自作無門獄，甘沉業火坑。轉流無暫歇，苦楚沒前程。大悟如求免，翻身道上行。莫於他處覓，心地早填平。

寄路才卿

君今能著鞭，我獨瞠若後。來秋積雨霽，涼風吹宇宙。行李青草鞋，杖藜隨在手。去去不計程，日用隨所有。西山佳處約平分，未必二兄真許否。

癸丑春送樊道錄赴闕

識面不數月，軟語接猶希。無何復相別，緩轡策輕肥。朔方晚春色，楊柳自依依。聯翩西北往，暗塵隨馬飛。去天不盈尺，作霖心莫違。舉首一明月，萬家同是輝。老我寄泉石，俟君衣錦歸。

七言律詩

讚道

浩蕩神光徹太虛，主張高厚定元初。大包宇宙極無外，細入毫芒光有餘。萬象斡旋通造化，羣生出沒賴吹嘘。物情不許通消息，動植飛潛各自如。

慶長春

霧捲千山萬里晴，壺天春滿氣盈盈。花心露滴無塵慮，柳眼風開不世情。稚子執迷遊廣漠，老仙高會約蓬瀛。坐傾碧酒歡無極，醉裏雲車倒載行。

乞紙被

此形端似護懸疣，勘破元真事事休。任喚馬牛皆不應，從交雞犬不知求。

一瓢糊口生涯足，百衲沿身歲計周。更向侯門乞紙被，夜寒蝸舍坐蒙頭。

頃年欲作紙被今幸成之

柔綿細疊軟溪藤，自製青綾一樣新。晝捲野雲飛不動，夜披江月照無垠。相宜質素功非俗，別得陽和煖似春。老去癯鍾資火力，矮床枯几伴閑身。

省迷

粹淳一散成澆漓，悠悠弱喪迷所之。視聽息食作者誰，流連忘返徒自疲。隋珠彈雀癡所用，取者愈輕索者重。幾時勘破人牛非，白雲是躡帝鄉歸。

又

儲金畜帛自遺咎，櫟社散樗那有灾。玉通潤色碎珉石，珠出夜光剗蚌胎。藏身不厭在深眇，外物已知真儻來。直此報渠難自信，又玄關鍵豈能開。

倦住持

出家移入道人家，換上清虛冷鐵枷。既悟幻緣非實相，何堪病目認空花。胥疏不及南山豹，跨跨真成坎井蛙。好藉十年閑杖屨，水雲遊歷興無涯。

郭子淵北行索詩時在通州

此別燕山第一程，潞川冰雪送君行。道人簡事爲繁事，對客無情似有情。跼穴但宜容蟄物，搏風從此奮鵬程。神遊八極無窮盡，未卜何時會玉京。

瑞雪

大地纖毫色色空，寥天望極一鴻濛。夜凝冷浸梅魂月，朝拂輕回縞帶風。身世密移塵境外，乾坤收入玉壺中。虛堂瑞草瓊林合，壓盡蓬萊第一峰。

打睡

放倒形山睫已交，耳邊塵冗任喧囂。杳冥忘記先生責，齟齬寧知弟子嘲。何礙夢魚遊澤國，不妨爲蝶戲花梢。惺惺一點遽然覺，遍界縱橫無不包。

中秋

塵世無能解所憂，相邀携手上南樓。道人午夜亦何樂，清坐仰天冥內遊。乾坤表裏忽瑩徹，大千沙界纖毫收。廓然物我忘所在，真境真歡無盡頭。

月輶光

萬籟沉沉秋氣豪，游雲薄薄天彌高。庾樓袁渚不成賞，倚棹停盃空望勞。

月本圓明自如故，逢時掩靄光宜韜。
人生真爲物逆旅，憂喜去來無所逃。

覺夢

而今說者夜來夢，夜來夢者而今說。
說者夢者莫非吾，如何覺夢生分別。
爲周爲蝶物之化，若爲抽釘與拔楔。
一念回機覺夢空，靈明透出塵沙劫。

希遇

萬世一遇同旦暮，千里有賢如比肩。
兩曜忽忽駒過隙，羣生冗冗絮漫天。
識情暫與雲泥隔，念慮纔分物我纏。
今古是非俱倒置，夢中誰暇救頭然。

獨坐

夢回周蝶兩誰分，跨鶴腰金各勿論。
耐久兩鄰松與石，虛明益友月兼雲。
鳥鳴風度張天籟，山色溪光示地文。
真境灑然塵事外，不勞重訪白元君。

失己

道人所住無所住，大用全機任逢遇。
有心覲面不相逢，失己亡行言意路。
楚些招魂魂未歸，利名終莫近離披。
微陽浮滾如麻粟，徒趁口鼓非實機。

自照

靈風鼓橐應何常，返照家家盡葆光。
絕相巖前豐瑞草，不萌枝上賸真香。
交梨火棗非他物，威鳳仁麟自致祥。
金籥玉匙開放得，水雲依約水雲鄉。

空代

蠻觸未知蝸縮出，槐壇空遣蜺交侵。
山河尔汝虛興廢，日月東西自古今。
得失不停翻復手，是非無定愛憎心。
誰能眼孔車輪大，一見空華盡陸沉。

心迷

夢幻境中朝復暮，利名場上是兼非。
紛紛乃致太多事，冗冗胡爲寧不歸。
眉斧有情嗟自伐，鼻斤無質爲誰揮。
幾時攻許愁城破，撥轉重玄向上機。

初任長春觀

而今壓盡范萊蕪，釜破厨空甌亦無。
敦杖蹙頤觀寂寞，入門掩口笑盧胡。
安排冷淡爲生計，指點虛無是所需。
不掛一毫閑打坐，更於何處覓衣珠。

舊隱

野懷唯憶甌林垞，杖屨時時踏軟青。
眼界寬舒無物隔，耳根清淨絕塵聽。

遶籬花木新粧靚，脫粟齏鹽舊典刑。
盡日經年無箇事，也勝鵬運上青冥。

迎將

器小何堪濁以清，人情推挽強披承。
正行自與錢神背，枯坐從教窮鬼憑。
將送豈能甘若醴，往來多責冷於冰。
請君點檢元常住，無恙庵西老葛藤。

世情

啼鳥芳花總屬春，箇中色色盡通神。
蛸翹蠹蠕隨時變，雀鵲鷹鳩逐化新。
世態紛紛俱倒置，物情滾滾謾橫陳。
塵埃漠漠迷朝市，但見黃金不見人。

訪友

鐵石肝腸傀儡身，赤心青眼訪同人。
運斤去聖難爲質，削鑿全天未即真。
人事執迷妖幻惑，世情般弄鬼神神。
相逢妙處無言說，白首仍須自斲輪。

同前

試奏鸞刀學解牛，世情推挽逆懸流。
明知幸脫塵樊累，爭肯甘爲土木囚。
遺劍刻舟流已遠，揭竿臨海父難求。
舉心一一成顛倒，勘破緣空萬事休。

遺言

識解誇張未肯藏，半生真似鬧蜂房。
文魔攪擾心旌亂，伎癢教唆舌本狂。
不審覆蕉誰得鹿，明知挾策亦忘羊。
咄哉多口成何事，打破疑團效括囊。

緘口

幸脫塵樊俗網羅，可憐還著聖賢魔。
紛紛未遣心中物，浩浩空翻紙上波。
既悟却同三懡懡，乃知猶有一無何。
從今卷舌宜緘口，保氣全神養太和。

著假

革囊兩脚走西東，誰向空中作主公。
驅遣百骸通九竅，橫生六鬼長三蟲。
一團骨肉從頭幻，萬種機關徹底空。
縱有本然真箇在，丁寧說著耳如聾。

化機

化機刻刻變從新，蠻觸閭浮夢裏身。
罕見混融生死友，倦聞嘈雜利名人。
華陽不遇閑歸獸，齊代空差老斲輪。
幻世幻身同幻惑，但能虛妄不能真。

襲明

傳薪續焰要重明，伏火丹爐冷似冰。
覺海夜來新月滿，性天時復瑞雲興。

壺中不種閑花草，物外元無老葛藤。
至理本從真實得，莫教心口不相應。

修行

修行何處最相親，清淨無爲達本真。
妙理亘初元具足，幻塵消盡復渾淪。
靈根秀發隨時現，大用全彰逐日新。
若向一邊求所得，到頭虛妄不關身。

洗心

心田荆棘剪除平，火棗交梨二樹生。
靈物本然無少剩，空花銷落自分明。
若珠若鑒圓而靜，如玉如冰潔又清。
莫道又玄傳不得，活機時復向人呈。

無爭

羣魔束首罷心兵，萬戶千門賀太平。
良夜雲收兼月白，聖時海晏及河清。
全勝夢到華胥國，不論時拘芥子城。
清淨本然無變壞，寶珠含攝大光明。

雲山集卷之一

雲山集卷之二

知常真人姬志真撰

好爭

人我山高占一涯，萬峰遮眼戟槎牙。
塵封古道無歸路，煙鎖靈源不到家。
爭肯束心如縛虎，祇須瞋目效鳴蛙。
一毫纔觸心兵發，直得橫尸亂似麻。

隨流

沿流端坐泛星槎，悟徹靈源却是家。
經卷詩囊閑戲具，藥爐丹鼎老生涯。
清溪道士邀明月，白石先生卧翠霞。
相對兩忘三益友，一篇秋水一盃茶。

居山

盤石巍巍權寶座，柔莎冗冗代青氈。
雲巖月竇排幽勝，風伯山靈助法筵。
溪水茂林俱演道，野花飛鳥盡通玄。
須臾逕及無何有，不待言傳總是仙。

合俗

誰家雞犬放知求，一片頑心不肯收。
耳目鎮爲聲色役，形骸常作利名囚。
向從薪者爭分鹿，懶逐庖丁學解牛。

顛倒是非無暫息，轉輪生滅幾時休。

參玄

嚼破重玄色色真，金花出水淨無塵。
壺天風物時時別，洞府雲霞刻刻新。
應化因緣俱幻相，亘初消息自通神。
叢林草木無分別，自是人中真箇人。

迷家

弱喪淪流路轉差，鈴聲千古不還家。
檀槐身世同行蠅，蠻觸閭浮等戰蝸。
聲色纏綿濃似蜜，是非翻攪亂如麻。
誰能自立衝天志，跳出迷津上月槎。

獨行

印破玄玄得縱收，須眉毫末盡天遊。
忘懷物外求雞犬，恒服從人喚馬牛。
有質揮斤無犯鼻，無情墮甑不回頭。
寥寥月白風清夜，江海飄飄一葉舟。

味真

清淨無爲體妙玄，一毫纔起污心田。
伸眉頃刻生多事，啓口分明落二邊。
有底坐同株塊累，幾多空被葛藤纏。
聚頭作相千何事，勘破般般不直錢。

形昧

元初撲入此形囚，冗冗勞生不暫休。

般弄骨骸呈伎倆，簸揚塵土販何樓。
是非叢裏爭開口，人我山前競出頭。
只待鼻綿吹不動，髑髏寧帖卧荒丘。

勞生

附贅懸疣大患身，從初特特認爲真。
貧窮急迫無由歇，富貴經營不暫伸。
名利場中添氣力，私邪路上長精神。
到頭畢竟成何物，苦您當機戲弄人。

邪見

瞎餌鯢鯨未見招，迎吞比比盡陽喬。
浮萍點水甘流蕩，落絮因風易動搖。
眼病只看真作僞，心顛番想善爲妖。
執迷固久難回換，更有歸來助長苗。

實德

纔生一念鬼神知，元本良心不可欺。
濟物利生忘取捨，從人屈己事謙卑。
私邪偏冗尋常撥，忠孝仁慈上下移。
恭謹至誠無詔曲，人天何處不相宜。

塵緣

交辨東西別有功，此心難與世情同。
瓊漿淡靜無知味，濁酒喧呼自作叢。
鮮瓮乍開蠅滿側，虛舟閑纜水連空。
蕙蘭不愠無人見，依舊清香拂晚風。

自藏

事事俱休一味癡，至誠唯與道相宜。
玄珠寶藏封須密，瑤藥瓊花發較遲。
丹藥煉成人莫識，神符飛處鬼難窺。
法身混合虛空界，妙用分明更不疑。

像法

立像明真便失真，朦朧昏眼更添塵。
丹青自此遮玄藏，土木何年露法身。
幻出因緣徒誑世，橫生機巧暗繩人。
謾神諱鬼彌天過，不畏閻家老子嗔。

教網

入門戴上鐵籠頭，牽去牽來不自由。
鉗束只依吾教誡，封緘不許外參求。
天堂妄想媒求福，地獄虛聲諱作憂。
久久薰成倡鬼例，妖邪惑魅死時休。

趨時

侯門似海我如魚，懸箔高門一一趨。
口自囁嚅心局促，身將擎蹠足趨趨。
道尊德貴斯爲安，俗網塵情自是拘。
元本棄家圖箇甚，思量渾錯用工夫。

俗念

茫茫苦海浩無邊，冗冗凡情總倒顛。
真偽顛預無所辨，是非淆亂孰能詮。

傾城共認狂爲聖，滿地唯看正作偏。
舉愛便宜爭敢逆，何年栽活火中蓮。

心亂

貧窮叨濫富驕淫，無足勞勞分外尋。
觸處施張行跡僞，動中搜索計謀深。
不生公正仁慈念，但蓄私邪利欲心。
積惡貫盈無可道，非災橫禍一時侵。

妄作

鑿破天真事事訛，日增人僞不知多。
閑神野鬼爭呈幻，走骨行屍自作魔。
利己害他常設險，貪生競物謾張羅。
隨身惡孽空擔負，果報臨身奈若何。

看經書

通書也勝不通書，及至通書可笑渠。
只向口頭閑咀嚼，幾曾心上自躊躇。
是非人我旋增長，利欲私邪肯破除。
向上一機明不得，之乎者也竟何如。

黜聰明

非破聰明總作愚，聰明唯恐自糊塗。
文華秀麗知而得，清淨圓明會也無。
多在舌尖呈伎倆，少能心地用功夫。
何時宇泰天光發，始信虛閑即道樞。

凡俗

慳貪嫉妬愛便宜，不顧危亡事事爲。
數盡勢窮無證據，灾生禍作莫椿持。
呼神喚鬼師巫跳，呪律書符善友醫。
香火旋燒纔欲善，閻家老子肯相隨。

心醉

道人得味飲靈泉，豈恃黃湯醉裏顛。
非殢六經窮奧旨，特宜三要會重玄。
名鉤出沒魚吞餌，利引東西蠅慕羶。
酪酊萬緣俱不問，卧看孤月上瑤天。

赤窮

聰明黜盡性天虛，浩劫塵情一一刳。
從此渾身赤骨立，肯交幻境概株拘。
牧牛不見人何在，置地全空錐也無。
窮到赤窮窮不得，活機放出莫非吾。

從正

從來結習縱貪婪，膠擾心靈苦不堪。
正令乍行邪並遣，真功微契道能參。
多生識寇知遊北，歷劫迷方意指南。
世世生生啖黃蘗，乳糖纔食便分甘。

實行

後已先人謙又謙，平懷本分自清廉。
利生接物仁無失，契理明真義亦兼。

莫幻妖邪驚世俗，休生詭異誑閭閻。
本行德業能深積，向上機關不用拈。

真功

休尋南嶽與天台，名相虛頭盡咄回。
財色兩忘心地穩，是非雙泯性天開。
真誠清靜行無間，公正仁慈德備該。
外行內功俱有積，亘容圓滿寶花臺。

劉輔之有女之戚

造物無情相戲弄，笑中不覺成悲慟。
司花幻出真可人，醞造十年歡喜夢。
夢破俱空猶不懂，盡心粧點傾城送。
聲銷線斷各還家，活墮一場乾取哄。

化空

造化相謾人不識，變態神通誰委悉。
電轉機關不可防，黯黯前程暗如漆。
翻掌存亡與消息，朝四暮三顛倒七。
憂喜橫生沒奈何，一團虛幻看成實。

風波

風波易動懷恩怨，結習難忘釀喜憂。
千古是非爭未歇，一生人我競無休。
英雄自致功名縛，豪傑尋爲利欲囚。
大事因緣俱不問，忙忙終日替人愁。

建化

元真非相相非真，建化門庭總屬塵。
塵裏孰能開正眼，物中誰解露全身。
解粘釋縛無多子，拔萃超羣有幾人。
自料本行非大器，且宜清靜自頤神。

住院

閭閻膠擾無休局，人事將迎勞檢束。
徒輩擎擔冷鐵枷，院門住守風流獄。
一毫失照心同俗，聚塊拈來泥裏浴。
慚愧西風著力吹，斷雲縹緲依巖谷。

論經

羣經權作躡天梯，黃葉拈來暫止啼。
過雨試看荷出水，因風尤喜絮沾泥。
豈宜驪鼠乘車馬，未見鷄鶩樂鼓鼙。
下里巴歌殆成俗，陽春唱出轉增疑。

自縛

有生翻攪不知空，戈戟槎牙塞滿胸。
非是海中窮徹底，我人山上長奇峰。
迷繩自縛三千匝，法網橫囚一萬重。
妄想欲超生死窟，知他閻老肯相從。

法相

莊嚴法相大施張，一例亡羊穀與臧。
生死途中虛出沒，名言路上謾商量。

然香撥火迎歸室，擊鼓鳴鐘弄上場。

似此利名心未息，如何能做法中王。

壇場

聚頭作相巧相籠，直得羣愚立下風。
弄假像真真作妄，將無作有有何功。
指空畫空未必得，依實主實還在中。
呈盡許多閑伎倆，化人不覺自盲聾。

未濟

劫運消磨惡轉遷，幾人曾結善因緣。
火坑炙爇身翻焰，苦海瀾漫浪接天。
有底揭竿趨灌漑，幾多鳴棹泛漁船。
昔年任老今安在，不見虹鈎轄餌懸。

悟真

要解懸疣脫苦囊，萬塵堆裏便回光。
多生積習重重撥，歷劫私邪羨羨忘。
不掛一絲形骸，丕承千古貌堂堂。
長春景界風光異，玉樹瓊林次第芳。

甘貧

蘆廬暫寄元非實，何礙磬懸空四壁。
之子方能脫網羅，乃心不肯甘沉溺。
積蘇累塊亦何物，拱壁兼金輕瓦礫。
幻化般般一筆勾，分明露出真端的。

法身

無位真人體若虛，物來不已應斯須。
舒開寶藏乾坤窄，放出圓光日月俱。
巨細洪纖同蘊此，有無高厚莫非吾。
茫茫沙界彌羅極，頃刻收來黍米珠。

忘外

具足莊嚴古道場，活人芝草返魂香。
全提法界藏真境，未放吾宗出葆光。
堯是桀非俱莫辨，鶴長鳬短兩相忘。
太平無象家家遇，拂袖歸來入醉鄉。

脫殼

夢中了了醉中醒，表裏仍存一味清。
事事拂餘真理足，塵塵滌盡法身輕。
破瓢度日饑方覓，營窟居冬暖後行。
不在世間圈續裏，自由閑散過平生。

塵累

萬塵堆裏喜擎擔，衣要尖新食要甘。
費用關心深計度，向求如意引貪婪。
名纏自作投籠鳥，利縛尋爲作蠶蚕。
分外閑愁認爲樂，騰騰不覺一生癡。

疑網

明知萬法本因心，何更將心向外尋。
自有丹砂求自得，誰爲猿馬使誰擒。

神頭鬼面須臾革，怪迹狂蹤倏忽沉。
大治洪鑪未經煅，楊灰終不見黃金。

尋山

咄嗟性癖愛尋山，及至山間却憶還。
俯仰坡陀艱負荷，崎嶇磴節倦躋攀。
力熊飢虎時臨側，獷獵備樵暮叩關。
爭似定心如玉立，卓然隨處自安閑。

遊仙人間

信步登臨學采真，公和遺躅鶴山鄰。
道鄉自屬雲霞侶，地僻元無車馬塵。
石底靈泉寒浸月，殿前古柏暗藏春。
草堂喚起山童問，還有呼風長嘯人。

訪五巖

五巖壁立列山顏，洞府深沉積翠環。
華蓋彌羅縣玉室，石門幽邃透玄關。
物經換世人何往，人去朝元鶴未還。
雅操不聞遺跡在，一天明月嘯臺閑。

罷釣

白蘋紅蓼幾千秋，鱖鱖金鱗不上鉤。
雲餌括囊徒自祕，虹竿收拾便宜休。
離朱罔測還南望，狂屈難言知北遊。
千丈洪濤滄海闊，滿天明月一虛舟。

溫邦瑞壽日

院宇朝來氣象佳，暗添福壽在君家。
人間幻境他時識，物外真風此日誇。
保命玉壺收絳雪，延生金鼎煉丹砂。
肯來共飲玄洲上，坐看蟠桃幾度花。

偶遇

喚起昏昏瞌睡禪，醺雞衝破瓮中天。
無窮境界寬如許，大解機關妙不傳。
臨水近山新事業，好風明月舊因緣。
目前草木皆通理，蟋蟀秋吟夜論玄。

自訟

造物分明戲革囊，區區猶著利名場。
晚年不禁多饒舌，好肉閑剗自作瘡。
益友逢迎漚聚散，幻身行止夢悠颺。
世間搔擾難安穩，却憶白雲深處藏。

重陽日游瓊花島

燕山重九約朋儔，杖履瓊花島上遊。
荒徑披榛穿古洞，危崖倚石翫神洲。
蒼松古栢蕭森日，紅葉黃花冷淡秋。
一事無懷幽興盡，却尋歸路棹輕舟。

與金坡老錢行

別話忽忽冰雪寒，班如馬首望西山。
篋中符籙方傳授，袖裏銀鋸肯放閑。

真似去年離闕下，復從今日到人間。
慇懃了却繁心事，趁取東風欵帝關。

送張文叔之和林

政尔天衢道大行，日遲風暖馬蹄輕。
北遊玄水通消息，橫列青山備送迎。
我亦冥搜窮鼠伎，君宜著力奮鵬程。
和林咫尺天威近，共企恩光下玉京。

同前

年老情多惜別離，不才剛作送行詩。
晝晴風度花飛日，春暖泥融燕語時。
別後不禁重作惡，望中無奈即成癡。
暮雲煙浪程程遠，回首尋盟未可知。

送何巨川從真人赴闕

鶴馭翩翩起自燕，搏風直上約鈞天。
龍堆沙漠幾千里，南海北游經半年。
別後更誰供一笑，坐中無與話重玄。
平生鐵石肝腸斷，老眼相看涕欲懸。

同前

君逢若士學盧敖，一舉凌雲萬丈高。
往矣扣閭親帝座，來斯署職列仙曹。
玄勳遠企通幽壤，大庇餘波及老饕。
不濟世間無用物，也宜林下醉蟠桃。